

ERINDISBRÉF

fyrir yfirkennara grunnskóla.

1. gr.

Yfirkennari skal gegna starfi sínu samkvæmt lögum, reglum og kjarasamningum sem gilda á hverjum tíma. Yfirkennara er skylt að gæta algerrar þagmælsku um einkamál nemenda og forráðamanna og önnur trúnaðarmál skóla. Þagnarskylda helst þó látið sé af störfum.

2. gr.

Þegar yfirkennari gegnir starfi skólastjóra sem staðgengill hans gildir erindisbréf skólastjóra. Með sama hætti gilda sömu reglur og eru í erindisbréfi fyrir kennara um kennslustarf yfirkennara og samskipti hans við nemendur.

3. gr.

Yfirkennari vinnur undir stjórn skólastjóra og skal hann m. a. vinna eftirtalin störf samkvæmt nánara samkomulagi við skólastjóra:

1. Í samstarfi við skólastjóra stjórnar hann daglegu starfi skóla.
2. Yfirkennari sinnir sérstökum verkefnum í samvinnu við skólastjóra.
3. Yfirkennari mætir á fundum sem staðgengill skólastjóra s. s. í fræðsluráði og hjá skólanefnd.

4. gr.

Menntamálaráðuneytið setur eða skipar yfirkennara að fenginni umsögn skólastjóra, kennararáðs og skólanefndar. Verði þessir aðilar sammála um að mæla með ákveðnum umsækjanda er ráðuneytinu skylt að fara eftir því.

Yfirkennara við heimavistarskóla skal ekki skipa í stöðu fyrr en eftir tveggja ára reynslu við störf í slíkum skóla.

5. gr.

Forfallist skólastjóri gegnir yfirkennari starfi hans á meðan og gildir erindisbréf skólastjóra þá um starf hans.

6. gr.

Erindisbréf þetta er sett samkvæmt lögum nr. 63/1974 um grunnskóla og öðlast þegar gildi.

Menntamálaráðuneytið, 20. ágúst 1984.

Ragnhildur Helgadóttir.

Knútur Hallsson.

Staðfesting forsetans á skipulagsskrá fyrir Styrktarsjóð aldraðra, útgefin á venjulegan hátt, að mandatum, af dómsmálaráðherra 20. júní 1984.

Skipulagsskráin er þannig:

SKIPULAGSSKRÁ

fyrir Styrktarsjóð aldraðra.

1. gr.

Sjóðurinn er sjálfseignarstofnun og nafn hans Styrktarsjóður aldraðra. Heimili sjóðsins og varnarþing er í Reykjavík.

2. gr.

Stofnfé sjóðsins er kr. 10 000,00, en það er framlag frá einstaklingi sem ekki vill láta nafn síns getið. Stofnfé sjóðsins ásamt 10% af ársvöxtum hans hverju sinni fram að því að stofnfé hefur tífaldast myndar höfuðstól, sem aldrei má skerða, sbr. og 5. gr.

3. gr.

Tilgangur sjóðsins er að styrkja eftir þörfum og getu hvers konar gagnlegar framkvæmdir, starfsemi og þjónustu í þágu aldraðra með beinum styrkjum og hagkvæmum lánum.

4. gr.

Tekjur sjóðsins eru:

1. Framlög og gjafir eldri borgara.
2. Dánargjafir.
3. Almennar minningargjafir og áheit.
4. Verðbætur og vextir.
5. Annað fé sem sjóðnum kann að áskotnast.

5. gr.

Við stofnfé leggst fyrst í stað 10% af því fé sem sjóðnum berst hverju sinni, svo og 10% af ársvöxtum hans. Að þessu undanskildu má þegar nota allt það fé sem sjóðnum berst samkvæmt tilgangi hans, samanber 3. gr. Þegar stofnfé sjóðsins hefur tífaldast, er heimilt að veita úr honum óskertar verðbætur, vexti og gjafafé sem kann að berast.

6. gr.

Heimilt er gefanda að ráðstafa gjöf sinni í samráði við stjórn sjóðsins til vissra staðbundinna framkvæmda eða starfsemi.

7. gr.

Stjórn sjóðsins skipa þrír menn, tilnefndir til 3ja ára í senn. Skal einn þeirra tilnefndur af stjórn Öryrkjabandalags Íslands og tveir af Samtökum aldraðra í Reykjavík. Tveir varamenn skulu einnig tilnefndir.

8. gr.

Sjóðstjórn semur árlega reikninga sjóðsins. Endurskoðendur Samtaka aldraðra endurskoða reikninga hans.

9. gr.

Verði ákveðið að hætta starfsemi sjóðsins skulu allar eignir hans renna til stofnunar eða stofnana, sem sinna dagvistunarþörfum aldraðra, skv. nánari ákvörðun stjórna Öryrkjabandalags Íslands og Samtaka aldraðra.

10. gr.

Leita skal staðfestingar forseta Íslands á skipulagsskrá þessari svo og á breytingum sem kunna að verða gerðar á henni, enda hafi þær verið samþykktar einróma af stjórn sjóðsins.